

**VENDIM**  
**Nr.239, datë 20.3.2020**

**PËR KËRKESAT TEKNIKE DHE FUNKSIONALE TË ZGJIDHJES SOFTWARE-  
IKE PËR PROCEDURËN E FATURIMIT DHE TË FISKALIZIMIT SI DHE  
PROCEDURËN E KRITERET PËR REGJISTRIMIN E PRODHUESVE E TË  
MIRËMBAJTËSVE TË ZGJIDHJEVE SOFTWARE-IKE**  
*(ndryshuar me VKM nr. 433, datë 15.7.2021; nr. 725, datë 13.12.2023)*

*(I përditësuar)*

Në mbështetje të nenit 100 të Kushtetutës dhe të pikës 10, të nenit 16, të ligjit nr.87/2019, “Për faturën dhe sistemin e monitorimit të qarkullimit”, me propozimin e ministrit të Financave dhe Ekonomisë, Këshilli i Ministrave

**VENDOSI:**

**I. DISPOZITA TË PËRGJITHSHME**

1. Ky vendim parashikon kërkesat teknike dhe funksionale të zgjidhjes software-ike për procedurën e faturimit e të fiskalizimit si dhe procedurën e kriteret për regjistrimin e prodhuesve e të mirëmbajtësve të programeve *dhe procedurën e monitorimit të shoqërive, të certifikuara si prodhues dhe/ose mirëmbajtës të zgjidhjeve software-ike*, sipas ligjit nr.87/2019, “Për faturën dhe sistemin e monitorimit të qarkullimit”, (në vijim ligji), si më poshtë vijon për:

a) regjistrimin e prodhuesve dhe të mirëmbajtësve të zgjidhjes software-ike për zbatimin e procedurës së fiskalizimit të transaksioneve me para në dorë dhe pa para në dorë, dhe për faturën shoqëruese;

b) regjistrimin e prodhuesve dhe të mirëmbajtësve të zgjidhjeve software-ike për regjistrimin e pagesave pa para në dorë të faturave elektronike; dhe

c) procedurën e certifikimit për zgjidhjen e *software-it*.

**II. DETYRIMI PËR TË INSTALUAR DHE/OSE PËRDORUR ZGJIDHJEN SOFTWARE-IKE**

2. Tatimpaguesit, të cilët lëshojnë faturë për furnizimin e mallrave dhe të shërbimeve, faturë shoqëruese për transportin e mallrave nga një vend në tjetrin në territorin e Republikës së Shqipërisë, pa ndryshim të pronësisë, dhe tatimpaguesit, të cilët operojnë në sektorë specifikë të biznesit, sipas vendimit përkatës të Këshillit të Ministrave, janë të detyruar të përdorin zgjidhjen e certifikuar të software-it në formën e një aplikacioni individual, ose një sistemi kompjuterik të integruar, ose një aplikacion Cloud, i cili mundëson:

a) krijimin e një fature, një fature shoqëruese dhe vendosjen e të gjithë elementeve të nevojshëm;

b) vlefshmërinë e operatorit që lëshon faturën ose faturën shoqëruese;

c) dërgimin e sigurt të të dhënave në sistemin qendror, duke përdorur certifikatën elektronike;

ç) lëshimin dhe pranimin e faturave elektronike;

d) transmetimin automatik të të dhënave në administratën tatimore dhe marrjen e mesazhit konfirmues nga administrata tatimore, pas verifikimit automatik të secilës faturë individuale ose fature shoqëruese;

dh) ruajtjen e të dhënave të faturave ose të faturave shoqëruese;

e) gjenerimin e numrit të sigurisë së lëshuesit të faturës (NSLF) dhe numrit të sigurisë së lëshuesit të faturës shoqëruese (NSLFSH);

ë) gjenerimin e kodit QR;

f) printimin e faturës ose thjesht kodit QR, në situata të përcaktuara në ligjin “Për faturën dhe sistemin e monitorimit të qarkullimit”;

- g) regjistrimin e depozitave të parave;
- gj) sigurojnë shkëmbimin e të dhënave në kohë reale dhe me autentifikim të sigurt të pajisjeve fiskale ekzistuese dhe sistemit të fiskalizimit;
- h) masa të tjera në procesin e fiskalizimit në zbatim të ligjit “Për faturën dhe sistemin e monitorimit”.

3. Bankat, institucionet financiare jobankare dhe subjektet e tjera, që ofrojnë shërbime pagese të faturave elektronike, janë të detyruar të përdorin pajisje elektronike dhe zgjidhje të certifikuar të software-it në formën e një aplikacioni individual, ose një sistemi kompjuterik të integruar, ose një aplikacion Cloud, i cili mundëson certifikimin elektronik, transmetimin automatik të të dhënave në administratën tatimore dhe marrjen e mesazhit të konfirmimit nga administrata tatimore pas verifikimit automatik të mesazhit në lidhje me pagesat e kryera nga një faturë elektronike.

*3.1. Prodhuesit dhe/ose mirëmbajtësit e zgjidhjeve software-ike, pas certifikimit duhet të deklarojnë në platformën qendrore të faturave numrin real të bizneseve, pranë të cilave është instaluar software-i, të dhënat identifikuese për klientët, si dhe vlefshmërinë e kontratave të lidhura me ta. Prodhuesit dhe/ose mirëmbajtësit e zgjidhjeve software-ike përditësojnë në vazhdimësi këto të dhëna.*

### III. REGJISTRIMI I PRODHUESVE DHE MIRËMBAJTËSVE TË SOFTWARE-IT

4. Çdo person juridik, shqiptar ose i huaj, në mënyrë që të ushtrojë veprimtari si prodhues dhe/ose mirëmbajtës i zgjidhjes software-ike, duhet të plotësojë kriteret e parashikuara në këtë vendim. Përpara fillimit të ushtrimit të veprimtarisë së ofrimit të zgjidhjes software-ike ose të shërbimeve të mirëmbajtjes në territorin e Republikës së Shqipërisë, prodhuesit dhe mirëmbajtësit e zgjidhjeve software-ike, duhet të regjistrohen në mënyrë elektronike në regjistrin e prodhuesve ose të mirëmbajtësve software-ike të AKSHI-t.

5. Aplikimi për t'u pajisur me certifikatë bëhet në mënyrë elektronike, përmes portalit e-Albania përpara ofrimit dhe shitjes së zgjidhjes *software* te tatimpaguesit, pra përpara ofrimit të shërbimeve të mirëmbajtjes.

6. Nëse prodhuesi ose mirëmbajtësi i zgjidhjes së software-it është një i huaj që nuk është i regjistruar në Republikën e Shqipërisë, duhet të regjistrohet në regjistrin tregtar sipas legjislacionit shqiptar.

7. Çdo person juridik, shqiptar ose i huaj, që kërkon të certifikohet dhe të regjistrohet në Regjistër për të ushtruar veprimtari si prodhues dhe/ose mirëmbajtës i zgjidhjes software-ike, duhet të plotësojë kërkesat në vijim:

a) Numri i punonjësve të shoqërisë të përcaktohet me përshkallëzim në bazë të numrit të bizneseve (për/NUIS) ku është instaluar programi:

- i. 1-500 (NUIS) minimumi tre (3) punonjës;
- ii. 501-1000 (NUIS) minimumi pesë (5) punonjës;
- iii. 1001-5000 (NUIS) minimumi tetë (8) punonjës;
- iv. Mbi 5001 (NUIS) minimumi 10 (dhjetë) punonjës,

të punësuar nga aplikanti për të paktën 6 muaj para paraqitjes së aplikimit të regjistrimit në regjistër, me kualifikimet e duhura, dhe shoqëria të përmbushë kriteret e mëposhtme:

- Të ketë të paktën 1 (një) punonjës të certifikuar për zhvillim dhe mirëmbajtje infrastrukture;
- Të ketë të paktën 1 (një) punonjës të certifikuar për zhvillim dhe mirëmbajtje network-u;
- Të ketë të paktën 1 (një) punonjës të certifikuar për zhvillim dhe mirëmbajtje aplikacioni web/mobile.

b) Shoqëria duhet të jetë aktive të paktën 1 (një) vit para paraqitjes së aplikimit për certifikim;

c) Të ketë të ardhura vjetore të tatueshme mbi 14 000 000 (katërmbëdhjetë milionë) lekë;

ç) Shoqëria ka në fushë veprimi veprimtarinë e zhvillimit, të mirëmbajtjes, të shitjes së zgjidhjeve software-ike për teknologjinë e informacionit, për ofrimin e pajisjeve fiskale dhe shërbime të telekomunikacionit;

d) Të vërtetojë me dokumentacion se ka kryer zhvillime software-ike apo aplikacione të ngjashme me objektin e këtij vendimi, përjashtimisht për kompanitë e telekomunikacionit, të cilat duhet të vërtetojnë veprimtarinë e tyre me vërtetim nga Autoriteti i Komunikimeve Elektronike dhe Postare (AKEP);

dh) Tatimpaguesit, të cilët kanë zhvilluar ose duan të zhvillojnë programin vetëm për nevojat e veta, jo për rishitje, detyrimisht duhet të certifikohen dhe të regjistrohen në regjistrin si më sipër, si dhe duhet të plotësojnë minimalisht kriteret e parashikuara në shkronjat “a”, “b”, “c”, të pikës 7, të këtij vendimi;

e) Aplikojnë, gjithashtu, për t’u certifikuar dhe për t’u regjistruar në regjistër, edhe prodhuesit e mirëmbajtësit, të cilët kanë zhvilluar infrastrukturën e ndërmjetme (server i ndërmjetëm), i cili do të sigurojë që, shkëmbimi i të dhënave i tatimpaguesve që janë pajisur dhe kanë instaluar një pajisje fiskale dhe që vendosin të vazhdojnë përdorimin e tyre edhe me sistemin e ri të fiskalizimit, të mundësohet në kohë reale, nëpërmjet këtij serveri në sistemin e fiskalizimit dhe të dhënat të shkëmbehen me autentifikim të sigurt, që sigurohet nga certifikata elektronike e marrë nga tatimpaguesit pranë AKSHI-t. Këta tatimpagues që të certifikohen dhe regjistrohen në regjistrin si mësipër duhet të plotësojnë, minimalisht, kriteret e parashikuara në shkronjat “a”, “b”, “c”, dhe “d”, të pikës 7, të këtij vendimi.

8. Aplikimi për certifikim duhet të paraqitet në mënyrë elektronike, si dhe duhet të shoqërohet nga informacioni/dokumentacioni, si më poshtë vijon:

a) Numri unik i identifikimit të prodhuesit/mirëmbajtësit të software-it;

b) Arsyeja e aplikimit:

- i. Prodhuesi i zgjidhjes software-ike për fiskalizimin e faturës;
- ii. Prodhuesi i zgjidhjes software-ike për fiskalizimin e faturës shoqëruese;
- iii. Prodhuesi i zgjidhjes software-ike për regjistrimin e pagesave pa para në dorë të faturave elektronike;

iv. Mirëmbajtësi i zgjidhjes software-ike.

c) Informacionin e kontaktit (emri dhe mbiemri i personit të kontaktit, numri i telefonit, adresa e-mail, adresa e postës);

ç) Emri, versioni dhe përshkrimi i shkurtër (specifikimi) i zgjidhjes së software-it;

d) Dokumentet që duhen paraqitur janë, si më poshtë vijon:

i. Kopje e kontratës së punës me punonjësit e përmendur në pikën 7, të këtij vendimi, dhe certifikatat përkatëse;

ii. Dëshmi që kompania nuk është në proces falimentimi;

iii. Një dokument që vërteton se subjekti dhe përfaqësuesi i tij ligjor (administratori) nuk janë dënuar për shkelje penale dhe nuk janë dënuar me vendim të gjykatës së formës së prerë, në lidhje me aktivitetin profesional;

iv. Pasqyrat financiare të audituara deri në 3 vitet e fundit;

v. Vërtetim për kryerje shërbimi (sektori publik)/fatura tatimore dhe kontrate (sektori privat) ku vërteton se ka kryer zhvillime software-ike apo aplikacione të ngjashme me objektin e këtij vendimi, ose vërtetim nga AKEP-i për shoqëritë e telekomunikacionit. Tatimpaguesit, sipas shkronjës “dh”, të pikës 7, të këtij vendimi, nuk e kanë detyrim për të zbatuar këtë pikë.

9. Shoqëritë që do të certifikohen për prodhimin dhe mirëmbajtjen e zgjidhjeve software-ike, duhet të përmbushin të gjitha kërkesat si më sipër, si dhe do të depozitojnë një garanci bankare ose nga shoqëritë e sigurimit në emër të Drejtorisë së Përgjithshme të Tatimeve (DPT), e vlefshme për gjatë periudhës së regjistrimit, duke filluar nga data e aplikimit për regjistrim në regjistër, në vlerat, si më poshtë vijon:

a) 4 000 000 (katër milionë) lekë, nëse programi është instaluar *deri në* 500 biznese;

b) 10 000 000 (dhjetë milionë) lekë, nëse programi është instaluar në më shumë se 500 *dhe deri në* 1 000 biznese;

c) 40 000 000 (dyzet milionë) lekë, nëse programi është instaluar në më shumë se 1 000 dhe deri në 5 000 biznese;

ç) 50 000 000 (pesëdhjetë milionë) lekë, nëse programi është instaluar në më shumë se 5 000 biznese.

Garancia, si më sipër, duhet të jetë pa kushte dhe e paapelueshme dhe të mund të aktivizohet që me thirrjen e parë të DPT-së, nëse shfuqizohet certifikata e lëshuar për mospërbushje të detyrimeve ligjore dhe të detyrimeve që rrjedhim nga ky vendim. Garancia, si më sipër, është e ndryshueshme/e rinovueshme në varësi të ndryshimit të numrit të bizneseve në të cilat është instaluar programi.

10. Nëse prodhuesi i zgjidhjes së software-it nuk është edhe zhvillues, atëherë prodhuesit e zgjidhjes software-ike duhet të paraqesin edhe kontratën e noterizuar si bashkim i operatorëve ekonomikë. Në këtë rast, të gjitha shoqëritë që marrin pjesë në bashkimin e operatorëve ekonomikë paraqesin dokumentet e kërkuara, sipas këtij vendimi, dhe vlerësimi i kriterëve kryhet për të gjithë pjesëmarrësit, me përjashtim të kërkesave të shkronjave "a", "c" dhe "d", të pikës 7, të cilat duhet të përmbushen minimalisht nga njëri prej pjesëmarrësve në bashkimin e operatorëve.

11. Të gjitha dokumentet e paraqitura duhet të jenë në gjuhën shqipe, kopje të noterizuara ose origjinale (përveç vërtetimit bankar, i cili duhet të jetë origjinal).

12. Prodhuesit e zgjidhjes së software-it, gjithashtu, duhet të depozitojnë pranë AKSHI-t zgjidhjen e software-it për verifikim kur regjistrohen në regjistër, edhe kur zhvillojnë një version të ri të zgjidhjes. Nëse prodhuesi është në të njëjtën kohë edhe mirëmbajtësi i zgjidhjes së software-it, ai do të duhet të regjistrohet vetëm një herë dhe do të ketë zgjedhje të shumta të arsyeve të regjistrimit.

*12.1 Subjektet aplikuese kanë detyrimin të dorëzojnë pranë AKSHI-it software-in me të njëjtat të dhëna si në aplikimin on-line jo më vonë se dita e nesërme e punës nga aplikimi në e-Albania. Në rast mosdorëzimi, subjekti do të duhet të riaplikojë në e-Albania.*

#### IV. CERTIFIKIMI I PROGRAMIT (SOFTWARE)

13. Zona për t'u testuar, përshkrimi i tyre, hapat e testimit dhe kriteret e suksesit përshkruhen në shtojcën 1, të këtij vendimi.

14. Prodhuesi ose mirëmbajtësi i zgjidhjeve software-ike që ka aplikuar për t'u regjistruar në regjistër, certifikohet nga AKSHI dhe DPT-ja përpara fillimit të ushtrimit të veprimtarisë së ofrimit të këtyre zgjidhjeve software-ike ose shërbimeve të mirëmbajtjes në territorin e Republikës së Shqipërisë, dhe sa herë që zhvillon një version të ri të zgjidhjes.

*14.1 Prodhuesi ose mirëmbajtësi i certifikuar i zgjidhjes software-ike, me kërkesë të AKSHI-t dhe të DPT-së, dorëzon versionin e përmirësuar të software-it brenda 15 (pesëmbëdhjetë) ditëve nga data e njoftimit, në rastet kur përmirësimi i kërkuar nuk sjell ndryshime thelbësore në software. Nëse përmirësimi i kërkuar sjell ndryshime thelbësore në software, dorëzimi i versionit të përmirësuar të software-it bëhet brenda 45 (dyzet e pesë) ditëve nga data e njoftimit.*

15. Komisioni i certifikimit, pas marrjes së informacionit të ardhur nga komisioni i monitorimit, i ngritur sipas pikës 16.2, të këtij vendimi, në rast se për operatorët prodhues/mirëmbajtës të zgjidhjeve software-ike të certifikuar kanë ndryshuar kriteret mbi bazën e të cilave janë certifikuar, vendos ricertifikimin e tyre, pasi të jetë rivlerësuar përmbushja e kërkesave, sipas krenut III, të këtij vendimi. Informacioni i përcjellë përmban të dhëna në lidhje me subjektin dhe kriteret konkrete që kanë ndryshuar, për të cilat nevojitet ricertifikimi i tij.

16. AKSHI dhe DPT-ja, me urdhër të përbashkët, do të ngrenë një komision të përhershëm, me specialistë sipas fushave të përkatësisë. Komisioni do të udhëhiqet nga dy bashkëkryetarë, dhe do të shqyrtojë kërkesat e çdo aplikanti, të dhënat dhe dokumentacionin e paraqitur dhe vetë zgjidhjen e software-it. Në rast se, aplikimi është i paplotë, Komisioni kërkon nga aplikanti plotësimin e aplikimit me dokumentacionin shtesë të nevojshëm. Afatet e parashikuara për trajtimin e çdo aplikimi janë ato të parashikuara në Kodin e Procedurave Administrative. Përgjegjësitë dhe detyrat e Komisionit të ngritur, sipas kësaj pike, do të përcaktohen në mënyrë të detajuar në urdhrin e përbashkët të dalë për këtë qëllim.

Pas vlerësimit të aplikimit, Komisioni harton një relacion sqarues, ku sugjeron që, AKSHI dhe DPT-ja të lëshojnë certifikatën e regjistrimit për aplikantin ose të vendosin refuzimin e kërkesës.

Certifikata lëshohet nëpërmjet portalit e-Albania. Certifikata do të përmbajë edhe kodin e prodhuesit/mirëmbajtësit të zgjidhjes së software-it dhe kodin e zgjidhjes së software-it të regjistruar.

Vendimi i refuzimit të aplikimit shoqërohet me arsyet përkatëse që kanë çuar në këtë vendim.

*16.1 Pas marrjes së vendimit nga ana e komisionit për miratimin e aplikimit, të dhënat e certifikatës do të plotësohen me ato të dhëna që aplikuesi ka deklaruar elektronikisht në aplikim për certifikim në portalin e-Albania.*

*16.2. AKSHI dhe DPT-ja, për monitorimin e zbatimit të këtij vendimi, me urdhër të përbashkët, ngrenë një komision të përbërshëm me specialistë, sipas fushave të përkatësisë, të ndryshëm nga komisioni i ngritur sipas pikës 16, të këtij vendimi, i cili do t'i monitorojë prodhuesit dhe/ose mirëmbajtësit e zgjidhjeve software-ike, në mënyrë të detyrueshme, të paktën 1 (një) herë në vit, në bazë të analizës së riskut dhe sa herë konstatohet e nevojshme, bazuar në informacionet e marra. Ky komision shqyrton informacionet e ardhura nga strukturat e tjera në DPT apo tek AKSHI, nga palët e treta, si dhe nga ankesat e qytetarëve, në lidhje me shkeljet e kryera nga prodhuesit dhe/ose mirëmbajtësit e zgjidhjeve software-ike, duke kryer më tej monitorime apo kontrolle për verifikimin e informacionit të marrë.*

17. Vetëm pasi prodhuesi/mirëmbajtësi i zgjidhjes së software-it të marrë certifikatën e tij, ai do të regjistrohet në regjistrin e prodhuesve apo të mirëmbajtësve software-ikë të AKSHI-it, i cili do të jetë publik dhe mund të fillojë me ofrimin e produkteve/shërbimeve të tij, sipas këtij vendimi, në tregun e Republikës së Shqipërisë.

*18. Nëse komisioni i përbërshëm, i ngritur sipas pikës 16.2, të këtij vendimi, konstaton se personi i certifikuar ka shkelur ndonjë nga dispozitat e këtij vendimi, brenda 10 (dhjetë) ditëve nga marrja dijeni për shkeljen e pretenduar, kryen verifikimet përkatëse, duke kërkuar të dhëna apo dokumente shtesë, sipas rastit edhe nga subjekti i certifikuar, ku është konstatuar shkelja, si dhe në çdo rast kërkon nga subjekti i certifikuar listën e tatimpaguesve, së bashku me të dhënat e kontaktit të tyre, të cilët kanë instaluar software-in e subjektit të certifikuar. Në përfundim të verifikimeve, komisioni harton një relacion sqarues dhe propozon masën përkatëse, të cilën ia përcjell titullarëve të AKSHI-t dhe DPT-së. Titullarët e AKSHI-t dhe DPT-së vendosin nëse do të shfuqizojnë ose jo certifikatën e dhënë. Vendimi për shfuqizimin e certifikatës, i marrë sipas kësaj pike, publikohet në një aneks të veçantë të regjistrit.*

*Subjektet e certifikuara gëzojnë të gjitha të drejtat dhe detyrimet e parashikuara nga Kodi i Procedurave Administrative.*

*Përgjegjësitë, detyrat, mënyra e monitorimit të prodhuesve dhe/ose mirëmbajtësve të zgjidhjeve software-ike, si dhe raportimi nga ana e komisionit të ngritur sipas pikës 16.2, të këtij vendimi, përcaktohen në mënyrë të hollësishme në rregulloren e përbashkët të AKSHI-t dhe DPT-së, të miratuar për këtë qëllim.*

## V. KODI I PROGRAMIT

19. Prodhuesi i zgjidhjes së programit (software) duhet të integrojë kodin e tij dhe kodin e zgjidhjes së software-it në të njëjtën zgjidhje software-ike dhe duhet t'i dorëzojë ato automatikisht në administratën tatimore, si më poshtë vijon:

a) Pas regjistrimit të parë të pajisjes elektronike të parave për pagesa në dorë, duhet të dorëzohet kodi i prodhuesit të software-it dhe kodi i zgjidhjes së software-it, së bashku me informacionet e tjera të përcaktuara;

b) Në secilin mesazh, së bashku me informacionet e tjera të shënimeve për transferimin e depove ose kuponat e transportit, duhet të dorëzohet kodi i zgjidhjes së software-it (gjatë fiskalizimit të secilës faturë shoqëruese ose kuponit të transportit);

c) Në secilin mesazh, së bashku me informacione të tjera në lidhje me pagesën e faturës elektronike pa para në dorë, do të dorëzohet kodi i zgjidhjes së software-it (gjatë njoftimit për pagesën e kryer).

## VI. PËRGJEGJËSIA E PRODHUESVE DHE MIRËMBAJTËSVE TË ZGJIDHJES SOFTWARE-IKE

20. Zgjidhja e software-it duhet të lejojë një zbatim të suksesshëm të procedurës së fiskalizimit dhe një njoftim të suksesshëm për pagesa pa para në dorë të faturave elektronike të kryera në përputhje nr.87/2019, dhe të çaktivizojë proceset që shmangin procedurën/njoftimin e fiskalizimit për pagesa pa para në dorë.

21. Për korrektësinë e përdorimit të zgjidhjes software-ike në procedurën e fiskalizimit të faturave të lëshuara/faturave shoqëruese dhe në procedurën e njoftimit të pagesave pa para, personat përgjegjës janë tatimpaguesit që lëshojnë faturë/fatura shoqëruese, banka, institucionet financiare jobankare dhe subjektet e tjera që ofrojnë shërbime pagese të faturave elektronike, si dhe prodhuesit/mirëmbajtësit e zgjidhjes software-ike, secili për rolin e tyre në proces.

21.1. *Konsiderohen shkelje të rënda, me pasojë revokimin e certifikatës, këto raste:*

- Heqja, shtimi apo ndryshimi i elementeve në faturat e lëshuara nga software-et e certifikuar;
- Vënia në dispozicion apo hedhja në treg nga shoqëritë e certifikuar të software-eve të tjera të pacertifikuar;
- Mosdeklarimi real i numrit të bizneseve pranë të cilave është instaluar software-i;
- Mosdeklarimi real i klientëve, si dhe i vlefshmërisë së kontratave;
- Shoqëritë e certifikuar pas përfundimit të afatit të garancisë nuk e rinovojnë atë në mënyrë të përsëritur;
- Shoqëritë e certifikuar e instalojnë software-in në një numër më të madh biznesesh nga sa është vendosur garancia dhe nuk shtojnë vlerën e garancisë;

- Kur komisioni i monitorimit, bazuar në informacionet e ardhura nga burimet e ndryshme, pas kryerjes së verifikimeve përkatëse, konstaton shkelje me pasojë revokimin e certifikatës.

21.2. *Çdo shkelje tjetër e dispozitave të këtij vendimi, që nuk përfshihet në përcaktimet e pikës 21.1 të këtij vendimi, konsiderohet shkelje e lehtë dhe, në këto raste, komisioni i ngritur sipas pikës 16.2 të këtij vendimi, paralajmëron shoqërinë e certifikuar se, në rast përsëritjeje, do të procedohet me revokimin e certifikatës. Gjithashtu, ky komision ia përcjell këtë informacion tatimpaguesve që rezultojnë se përdorin software-in e shoqërisë, tek e cila janë hasur problematika.*

21.3. *Në rastet kur komisioni i ngritur sipas pikës 16.2 të këtij vendimi, vendos revokimin e certifikatës, ky vendim hyn në fuqi pas kalimit të një afati 60-ditor (gjashtëdhjetëditor) nga e nesërmeja e njoftimit të tij pranë shoqërisë (prodhuesit/mirëmbajtësit të zgjidhjes software-ike). Komisioni merr masa të menjëhershme për njoftimin e tatimpaguesve, të cilët rezultojnë se përdorin software-in e kësaj shoqërie, për t'u regjistruar pranë një shoqërie tjetër të certifikuar. Brenda afatit 60-ditor (gjashtëdhjetëditor) këta tatimpagues duhet të regjistrohen pranë një shoqërie tjetër të certifikuar.*

21.4. *Pas revokimit të certifikatës, garancia e vendosur sipas parashikimeve të pikës 9, të këtij vendimi, ekzekutohet menjëherë nga DPT-ja. Tatimpaguesit e përmendur në pikën 21.3 të këtij vendimi, dëmshpërblehen nga DPT-ja deri në masën e garancisë së vendosur nga shoqëria, në përpjesëtim me numrin e bizneseve të regjistruara pranë saj. Procedurat dhe mënyrat e dëmshpërblimit, sipas kësaj pike, rregullohen me urdhër të titullarit të DPT-së. Në rastin e prodhuesve dhe të mirëmbajtësve të zgjidhjeve software-ike për përdorim vetjak, si dhe në rastin e bankave të certifikuar në cilësinë e prodhuesve dhe të mirëmbajtësve të zgjidhjeve software-ike për regjistrimin e pagesave pa para në dorë të faturave elektronike, garancia kalon në favor të DPT-së.*

## VII. ORGANET QË NGARKOHEN PËR ZBATIM

22. Ngarkohen Agjencia Kombëtare e Shoqërisë së Informacionit dhe Drejtoria e Përgjithshme e Tatimeve për zbatimin e këtij vendimi.

Ky vendim hyn në fuqi pas botimit në Fletoren Zyrtare.

KRYEMINISTËR  
Edi Rama

**SHTOJCË 1**

ID	Fusha e testimit	Përshkrimi	Hapat e testimit	Kriteret e suksesit
1	Regjistrimi i pajisjes elektronike të parave	Çdo pajisje elektronike e parave duhet të regjistrohet në SQF (Sistemin qendror të faurave) për të marrë kodin që përfaqëson atë. Ky kod përdoret për identifikimin e pajisjes elektronike të parave në mesazhet që shkëmbehen midis saj dhe SQF. Ky regjistrim duhet të bëhet vetëm një herë kur pajisja elektronike e parave është instaluar në vendndodhjen e biznesit ku përdoret.	Pasi pajisja elektronike e parave është e lidhur në internet, operatori fillon procesin e regjistrimit. Mesazhi i dërguar i regjistrimit verifikohet për nese eshte i plote dhe për të konfirmuar që kodi unik i pajisjes elektronike të parave është futur në pajisje. Mesazhet e shkëmbimit verifikohen për tërësinë dhe për respektimin e dokumentit të specifikimeve teknike.	Pajisja është regjistruar në SQF dhe kodi unik i jepet pajisjes dhe ruhet në te.
2	Regjistrimi i gjendjes së parave në pajisjen elektronike	Çdo ditë para regjistrimit të faturës së parë në SQF, çdo pajisje elektronike e parave për trajtimin e transaksioneve duhet të regjistrojë shumën e gjendjes në arkë. Gjatë ditës, operatori mund të shtojë ose të marrë para nga pajisja elektronike dhe të kontrollojë sasinë gjendje dhe me pas operatori duhet të fillojë veprimin e regjistrimit të depozitave të reja (aktuale).	Operatori fillon operacionin për regjistrimin e gjendjes së parave. Mesazhi i dërguar është verifikuar për plotësinë dhe për të konfirmuar që gjendja në para në pajisjen elektronike raportohet në SQF. Mesazhet e shkëmbimit	Depozita e parave në pajisjen elektronike raportohet në SQF dhe shuma e njëjtë e depozitave të parave ruhen si në SQF ashtu edhe në pajisje.

ID	Fusha e testimit	Përshkrimi	Hapat e testimit	Kriteret e suksesit
			verifikohen për tërësinë dhe për respektimin e dokumentit të specifikimeve teknike.	
3	Regjistrimi i faturës	<p>Lëshuesi (zbatuesi i fiskalizimit) duhet të japë informacione për secilën faturë që ai lëshon. Informacioni duhet të dorëzohet në momentin e lëshimit. Bëjne përjashtim vetem rastet kur mund ta dorëzojnë më pas (kjo varet nga ligji dhe aktet nenligjore).</p> <p>Procesi i shkëmbimit të të dhënave fillon në momentin kur lëshuesi do të lëshojë një faturë për klientin. Pajisja elektronike përgatit të dhënat e faturës dhe bazuar në ato të dhëna, krijon IIC. Pas kësaj, përgatit një mesazh të kërkesës së faturës XML dhe e certifikon me anë të certifikates elektronike, duke përdorur një certifikatë me qëllim zbatimin e fiskalizimit. Pas kësaj fillon komunikimi me një drejtim TLS dhe pasi të jetë i suksesshëm, -thërret shërbimin.</p> <p>Sistemi qendror i informacionit merr dhe përpunon mesazhin e kërkesës. Nëse kërkesa përpunohet me sukses</p> <p>Pajisja elektronike e parave merr mesazh përgjigjeje dhe kontrollon nënshkrimin e saj elektronik. Pas kësaj</p>	<p>Operatori fillon operacionin për regjistrimin e faturës. Mesazhi i dërguar vërtetohet që është i plotë dhe konfirmon që fatura raportohet në SQF.</p> <p>Mesazhet e shkëmbyera verifikohen për tërësinë dhe për respektimin e dokumentit të specifikimeve teknike.</p> <p>Operatori bën printimin e faturës së fiskalizuar.</p>	<p>Fatura raportohet siç duhet në sistemin qendror. Sasia e saktë e faturave dhe fushat e të dhënave janë në pajisjen elektronike të parave dhe në SQF. Fatura prinohet me sukses në formatin e miratuar.</p>

ID	Fusha e testimit	Përshkrimi	Hapat e testimit	Kriteret e suksesit
4	Eksportimi i faturave të pafiskalizuara	<p>Ka raste kur fiskalizimi i faturës nuk do të jetë i mundur në momentin e lëshimit të faturës. Arsyeja për këtë është mungesa e lidhjes në internet për shkak të vendndodhjes së lëshuesit në zona të largëta ose për shkak të dhënies së shërbimeve në vendet ku lidhja e internetit nuk është e mundur.</p> <p>Në këto situata, lëshuesi do t'ia lëshojë faturën blerësit, së bashku me të gjitha elementet e saj, por fiskalizimi nuk do të bëhet në momentin e lëshimit të faturës. Lëshuesit do të ruajnë faturat që u lëshuan në pajisjen fiskale.</p> <p>Çdo mesazh, që përmban ISC dhe është në format XML, për shembull &lt;RegisterInvoiceRequest&gt;... &lt;/RegisterInvoiceRequest&gt;, do të futet në dosjen e vet.</p> <p>Emërtimi i dosjes do të ndjekë këtë konventë: RegisterInvoiceRequest_ &lt;NUIS-number&gt;_ &lt;ISC&gt;_ &lt;yyyyMMddHHmmss&gt; .xml</p> <p>Pasi lëshuesi të mundësojë lidhjen në internet, ai do të bëjë fiskalizimin e faturave të tij përmes portalit të vetshërbimit. Mundësia tjetër për lëshuesin e faturave është dërgimi i mesazheve të tij në administratën tatimore ku vete administrata do të bëjë fiskalizimin për llogari të tatimpaguesit.</p>	<p>Operatori zgjedh faturat e pafiskalizuara dhe kryen eksportin në median portative (USB ose të ngjashme). Faturat e eksportuara verifikohen që janë të plota. Operatori fillon importimin e faturave fiskale (pas fiskalizimit). Të gjitha faturat e paracaktuara më parë janë zëvendësuar me fatura të importuara fiskale.</p>	<p>Të gjitha faturat e pafiskalizuara që janë zgjedhur për eksport, ruhen në median lokale në formatin e përshkruar. Faturat e eksportuara janë të njëjta me faturat e pafiskalizuara në sistemin e pajisjes elektronike të parave. Pas fiskalizimit dhe importit të faturave, faturat e mëparshme të paregjistruara fiskalizohen.</p>

ID	Fusha e testimit	Përshkrimi	Hapat e testimit	Kriteret e suksesit
		Pasi përdoruesi të fiskalizojë faturën duke përdorur portalin te vetsherbimit, faturat e fiskalizuara do të ngarkohen përsëri në pajisjen elektronike të parave për të zëvendësuar faturat origjinale të cilat nuk janë fiskalizuara.		
5	Faturat shoqëruese	Fatura shoqëruese është një dokument që dërgohet kur mallrat transferohen midis ambienteve të biznesit të njëjtë pronar (kompani) ose midis magazinave dhe njësisë së shitjes së biznesit  Procesi në vetvete fillon me kërkesën për faturën e re. Fiskalizimi fillon dhe një mesazh XML krijohet në pajisjen elektronike të parave të taksapaguesit dhe më pas nënshkruhet me një certifikatë digjitale. Mesazhi pastaj dërgohet në SQF. Nëse është e vlefshme	Operatori fillon operacionin për të gjeneruar dhe dërguar një faturë shoqëruese në SQF. Mesazhi i dërguar është verifikuar për plotësinë dhe për të konfirmuar që fatura shoqëruese raportohet në SQF. Mesazhet e shkëmbyera verifikohen për tërësinë dhe për respektimin e dokumentit të specifikimeve teknike. Operatori bën printimin e faturës shoqëruese.	Fatura shoqëruese raportohet siç duhet në sistemin qendror. Fushat e sakta të të dhënave janë në Pajisjen elektronike të parave dhe SQF. Fatura shoqëruese shtypet me sukses në formatin e përshkruar.
6	Përballja me gabimin	Në rast të një gabimi në përpunimin e mesazhit të kërkesës, një mesazh gabimi dërgohet si përgjigje nga SQF. Mesazhet e gabimit ndajnë të njëjtin format të përgjithshëm i cili bazohet në versionin 1.1 të mesazhit të gabimit SOAP dhe zgjerohet me elementin XML të kodit i cili përfaqëson kodin numerik të gabimit.	Operatori simulon gabimin nga një listë e gabimeve të mundshme që SQF mund të përpunojë. Për secilin gabim duhet të merret dhe përpunohet një mesazh përgjigjeje.	Të gjitha gabimet janë paraqitur në mënyrë korrekte në pajisjen elektronike të parave.

ID	Fusha e testimit	Përshkrimi	Hapat e testimit	Kriteret e suksesit
7	Lista e faturave të fiskalizuara dhe të pafiskalizuara	Pajisja elektronike e parave duhet të jetë në gjendje të tregojë të gjitha faturat e fiskalizuara së bashku me ato që nuk janë fiskalizuar	Operatori i kërkon pajisjes elektronike të parave një listë të të gjitha faturave të pafiskalizuara.	Të gjitha faturat e pafiskalizuara janë të dukshme në ekran dhe janë gati të eksportohen.
8	Rifiskalizimi	Pajisja elektronike e parave duhet të jetë në gjendje të dërgojë faturat në shërbimin e fiskalizimit në rast se lidhja e internetit ndërpritet për një periudhë kohe	Operatori fillon fiskalizimin e të gjitha faturave të pafiskalizuara (interneti është i disponueshëm)	Të gjitha faturat e pafiskalizuara më parë tani janë fiskalizuar.
9	Fatura korrigjuese	Fatura mund të korrigjohet duke dërguar mesazhin e korrigjuar  Fatura nuk mund të fshihet.	Operatori zgjedh faturën dhe fillon shërbimin për korrigjimin e faturës. Mesazhi i dërguar është verifikuar që është i plote dhe për të konfirmuar që fatura e korrigjuar raportohet në SQF. Mesazhet e shkëmbimit verifikohen për tërësinë dhe për respektimin e dokumentit të specifikimeve teknike. Ndërfaqja e përdoruesit nuk lejon fshirjen e faturës.	Fatura korrigjohet me sukses. Mesazhi i korrigjimit është i dukshëm në pajisjen elektronike të parave.
10	Mënyra e faturimit offline	Fatura shtypet në një modalitet offline sipas rregullave të specifikuara në dokumentet e specifikimit funksional dhe teknik (pa ISC, por me UII)	Operatori fillon lëshimin e faturës në mënyrë offline. Fatura duhet të shtypet në	Fatura është printuar me sukses. Në faturë kodi UII është i dukshëm së

ID	Fusha e testimit	Përshkrimi	Hapat e testimit	Kriteret e suksesit
			Operatori fillon lëshimin e faturës në mënyrë offline. Fatura duhet të shtypet në	Fatura është printuar me sukses. Në faturë kodi UII është i dukshëm së